

Headlines

- 1 जम्मू-कश्मीर दिएं सब्बनें 5 संसदीय सीटें लेई मतदान दी प्रक्रिया पूरी होई गई ऐ। चुनांस मैदान च खड़ोते दे सब्बनें मेदवारें दी किस्मत दा फैसला ई.वी.एम च बंद, नतीजें दा ऐलान 4 जून गी होगा।
- 2 सख्त सुरक्षा बंदोबस्तें हेठ पुंछ थमां 474 ईवीएम मशीनां राजौरी कंट्रोल रूम भेजियां गेइयां।
- 3 मुख्ब चुनांस आयुक्त राजीव कुमार होरें आखेआ ऐ जे जम्मू-कश्मीर च विधानसभा चुनाएं दी प्रक्रिया तौले शुरू कीती जाग।
- 4 किश्तवाड़ जिला प्रशासन दूर-दरेडे इलाके दिएं कुड़िएं लेई इक होस्टल खोल्लग तां जे उनेंगी उच्च शिक्षा हासल करने लेई प्रेरित कीता जाई सकै।
- 5 आई.पी.एल क्रिकेट च अज्ज संझा सनराइजर्स हैदराबाद ते कोलकाता नाईट राइडर्स बश्कार प्रतियोगिता दा फाइनल मुकाबला खेड्डेया जाग।

<><><><><><>

Voting-Turnout

लोकसभा चुनां दे 6में चरण दा मतदान कल सम्पन्न होआ। कुल 61 इशारिया 7-6 प्रतिशत वोट पे। 6 राज्यें ते 2 संघ शासित प्रदेशें दे 58 संसदीय हल्के च मतदान होआ जेडा शांतिपूर्ण रेया। इस सीट लेई उत्तर प्रदेश च 14 सीटें, हरियाणा च 10, बिहार ते पच्छिम बंगाल च 8-8, दिल्ली च सब्बने 7, ओडिशा च 6, झारखंड च 4 ते जम्मू कश्मीर दी इक सीट लेई वोट पाए गो। लोकसभा चुनां दे इस चरण च 889 मेदवार मैदान च हे।

<><><><><><>

J&K Elections

अनंतनाग लोकसभा हल्के च मतदाताएं लोकसभा चुनाएं च एतिहासिक मतदान कीता ते लोकतंत्र दी मजबूती च विश्वास प्रकट कीता। कल होए दे मतदान च इस संसदीय क्षेत्र च 53 प्रतिशत वोट पे। एहूदे कन्नै गै जम्मू-कश्मीर दी सब्बनें सीटें लेई मतदान पूरा होई गेआ ऐ। जम्मू-कश्मीर दे मुख्ब चुनां अधिकारी पांडुरंग के. पोले होरें जानकारी दिती ऐ जे प्रदेश दे सब्बनें 5 संसदीय हल्के च 58 इशारिया 1 प्रतिशत मतदान होआ ऐ जेहडा पिच्छले 35 बरें च सब्बनें शा बद् ऐ। उपराज्यपाल मनोज सिन्हा होरें राजौरी अनंतनाग संसदीय हल्के च ऐतिहासिक मतदान लेई लोकें गी शुभकामनां दित्तियां न ते प्रक्रिया च शामिल सब्बनें दी सराहना कीती ऐ। उपराज्यपाल होरें जम्मू कश्मीर पोलीस ते सुरक्षाबलें दे शानदार सुरक्षा बंदोबस्तें लेई बी सराहना कीती।

<><><><><><>

EVM-Dispatched

अनंतनाग राजौरी सीट पर वोटें दी गिनतरी गी रमानदारी कन्नै कराने दे मकसद कन्नै 474 इलेक्ट्रानिक वोटिंग मशीनें गी अज्ज बडुलै राजौरी कंट्रोल रूम भेजेया गेआ। पुंछ दे असिस्टेंट कमिशनर रेवन्यू कदीर उल रहमान होरें E.V.M's दी सुरक्षित ढोआई गी यकीनी बनाया। E.V.M's गी आधुनिक सुरक्षा गड्डी राएं लोडचदे सुरक्षा प्रबंधें तैहत लेता गेआ।

<><><><><><>

Assembly-Elections

लोकसभा चुनाएं च जम्मू-कश्मीर च मतदाताएं दे जोश गी दिक्खदे होई प्रदेश च बडी तौले विधानसभा चुनाएं दी प्रक्रिया शुरू कीती जाग। दिल्ली च इक्क समाचार एजेंसी कन्नै गल्ल करदे होई मुख्ब चुनां आयुक्त राजीव कुमार होरें एहू गल्ल आक्खी ऐ। श्री कुमार होरें गलाया जे जम्मू-कश्मीर च लोकसभा चुनाएं च लोकें दी इन्नी बद् शमूलियत दिक्खियै चुनां आयोग दा दिल बधेया ऐ। उनें आखेआ जे जम्मू-कश्मीर दे लोक अपनी सरकार चुनने दे हकदार न ते चुनां आयोग इस भेठा लोडचदी प्रक्रिया

बड़ी तौले शुरू करोग। एहदे शा पैहले जंदे मार्च म्हीने लोकसभा चुनाएं दिएं तरीकें दा ऐलान करदे होई कुमार होरें आखेआ हा जे जम्मू-कश्मीर च साज-समेयान ते सुरक्षा कारणें दे चलदे इत्थे लोकसभा ते विधानसभा चुनां कन्नो-कन्नो करोआना मुमकिन नेई ऐ। अगस्त 2019 च जम्मू-कश्मीर थमां दफा 370 हटाने ते इसी दऊं केंद्र शासित प्रदेशें च तकसीम करने बाद इत्थे अजें तोहडी विधानसभा दे चुनां नेई करोआए गेदे ना। जम्मू-कश्मीर च कीती गेदी हदबंदी दे बाद इत्थे असैम्बली दिएं सीटें गी 83 थमां बधाइयै 90 करी दित्ता गेदा ऐ। इंदे च पाकिस्तान दे गैर कनूनी कब्जे आले जम्मू-कश्मीर दिआं सीटां बी शामिल ना। जंदे दिसंबर म्हीने सर्वोच्च अदालतै चुनां आयोग गी 30 सितंबर तगर जम्मू-कश्मीर च विधानसभा दे चुनां करोआने दा निर्देश दित्ता हा।

<><><><><><>

NCC-Cadets

एनसीसी ग्रुप जम्मू दे त्रौं कैडेटें गी Mount kang yatse-II चोटी दे प्रतिष्ठित पर्वतारोहण अभियान 2024 लेई चुनेया गेआ ऐ। कैडेट अरूण सिंह, कैडेट मोहित कनाथिया ते कैडेट दिशू ठाकुर नै एह कामयाबी पाई ऐ। इनें कैडेटें गी पैहले निदेशालय स्तर पर दार्जलिंग च प्राथमिक पर्वतारोहण कोर्स च शानदार प्रदर्शन दौरान चुनेया गेआ हा। मगरा डी.जी एनसीसी कैम्प दिल्ली च शारीरिक प्रशिक्षण ते लिखित परीक्षाएं मगरा इंदी ताल कीती गेई। इनें कैडेटें दी शानदार उपलब्धि नै जम्मू-कश्मीर गी गौरवांवित कीता ऐ।

<><><><><><>

Stray Animals Kathua

बददे तापमान ते खुशक मौसम दे चलदे कटुआ च इक समाजी संस्था “Something for humanity” आस्सेआ इक नेक शुरूआत कीती गेई ऐ जेदे तैहत 70 पानी दे टब काली बड़ी थमां हटली मोड़ बश्कार बक्ख-बक्ख थाहरें रक्खे गे तां जे खुल्ले चौखरें, गमें, कुत्तें ते पंछिं गी पानी उपलब्ध होई सकै। आकाशवाणी संवाददाता कन्नै गल्ल करदे होई संस्था दे प्रधान नरिंद्र पाल सिंह होरें मती जानकारी दित्ती।

<><><><><><>

DC-Kishtwar

जिला प्रशासन किशतवाड़, डिप्टी कमिशनर डॉक्टर देवांश यादव हुंदे मागदर्शन हेठ जिले च स्कूल ते कालेज पढा करदी कुड़िं लेई होस्टल दी सुविधा शुरू करोग। डिप्टी कमिशनर होरें दस्सेया जे इक महत्वपूर्ण गैहू तैहत कुड़िं दी शिक्षा गी बढावा देने लेई किशतवाड़ च उडान योजना हेठ तौले गै कुड़िं लेई होस्टल खोलेया जाग तां जे ओहू पढी-लिखियै अपने सुखने गी साकार करी सकन। उनें दस्सेया जे जिला रेड क्रॉस सोसायटी मुफ्त गै सब्बै बुनियादी सुविधां उपलब्ध करोआग। उनें आखेआ।

<><><><><><>

JKPDCL

जम्मू च बिजली दी बंडु सरबंधी कारपोरेशन-जे.पी.डी.सी.एल. दे मैनेजिंग डरैक्टर विकास कुंडल होरें दस्सेया ऐ जे कारपोरेशन नै जम्मू लेई 200 मेगावाट बादू बिजली खरीदने दी प्रक्रिया पूरी करी लैती ऐ ते एहदे करी बड़ी भारी गर्मी दे इस मौसम च लोकें गी बड़ी राहत हासल होग। उनें दस्सेया जे जम्मू संभाग दा बिजली पर मजूदा कोटा 1200 मैगावाट हा पर एल.जी प्रशासन दे जत्तें करी इसी कोटे गी बधाइयै हुन 1400 मैगावाट करी दित्ता गेआ ऐ। बयान च आखेआ गेआ ऐ जे जम्मू शैहरा दे स्मार्ट मीटर आले इलाकें च बिजली दी कटौती नेई होआ करोग ते ग्रामीण इलाकें च होने आली कटौती च बी कमी आंदी जाग। जे.पी.डी.सी.एल. नै जम्मू दे लोकें गी अपील कीती ऐ जे ओहू समझदारी कन्नै बिजली दा इस्तेमाल करन ते कुसै किस्मै दी बिजली चोरी नेई करन तां जे सब्बनें उपभोक्ताएं गी बिजली उपलब्ध होई सकै।

<><><><><><>

Indian-Army Poonch

पुंछ च प्राइमवुड स्कूल साबरा च भारतीय सेना आस्सेआ इक युवा जागरूकता व्याख्यान कराया गेआ जेदा मकसद नौजवानें च कैरियर बनाने, मानसिक सेहत, सामाजिक जिम्मेदारिं ते डिजिटल साक्षरता सने बक्ख-बक्ख महत्वपूर्ण मामलें बारे जागरूकता च बादा करना ऐ, एहदे अलावा नौजवानें गी महत्वपूर्ण उचित फैसले लैने ते समाज लेई सकारात्मक योगदान देने

लेई बी जागरूक कीता गेआ। इस मौके पर सामूहिक चर्चा, गल्लबात सक्रिय हिस्सेदारी ते अपने-अपने अनुभव सांझे करने जनेई गतिविधिएं गी बी कराया गेआ।

<><><><><><>

LoC Akhnoor

अखनूर सब डिविजन दे प्लांवाला इलाके च नियंत्रण रेखा दे नेडे स्थित इक अगेत्रे ग्रां थमां सुरक्षाबलें इक बंगलादेशी नागरिक गी हिरासत च लैत्ता ऐ जेहड़ा दमागी तौर पर कसरी बझोआ करदा ऐ। इलाके च गश्त करै करदे फौज दे जवानें कल खौड़ इलाके दे लोअर कोट मैरां च आवारा घुम्मा करदे इस व्यक्ति गी पुच्छ-गिच्छ लेई हिरासता च लैता। इस व्यक्ति नै अपनी पंछान बंगलादेश दे अलुपोट्टी नाटोर इलाके दे रौहने आले तफज्जल बबलु दे तौर पर दस्सी ऐ। उसी फिलहाल पुलस दे हवाले करी दित्ता गेआ ऐ। ओदे कब्जे शा बंगलादेशी करंसी दा इक नोट, इक सिक्का, 3 सिमकार्ड, इक विद्यार्थी कार्ड, किश बिल ते इक डायरी बरामद कीती गेई ऐ।

<><><><><><>

Patnitop-Marathon

चौथी पत्नीटॉप मैराथन दा अज्ज स्काई-व्यू आस्सेआ आयोजन कीता गेआ। पत्नीटॉप मैराथन एहदे च हिस्सा लैने आहलें गी इक शानदार अनुभव दा मौका उपलब्ध करांदी ऐ, उनेंगी इक्क गंडोला राइड, इक अधिकारिक टी-शर्ट, मैराथन पूरी करने आला प्रमाण पत्र ते नाश्ता बी दित्ता जंदा ऐ। पत्नीटॉप मैराथन च ऐगती मती गिनतरी च लोकें हिस्सा ते नौजवानें गी शारीरिक ते मानसिक तौर पर सेहतमंद रौहने दी प्रेरणा दित्ती।

<><><><><><>

IPL

आई.पी.एल क्रिकेट च अज्ज सनराइजर्स हैदराबाद ते कोलकाता नाईट राइडर्स बश्कार चेन्नई दे एम.ए चिदंबरम स्टेडियम च इस प्रतियोगिता दा फाइनल मुकाबला खेड्डेया जाग। मैच संझा साड्डे 7 बजे शुरू होगा।

<><><><><><>

Heat-Wave

जम्मू-कश्मीर दे मते सारे हिस्सें च पारा चढ़ने करी जम्मू संभाग च बी गर्मी दा प्रकोप बधी गेआ ऐ। मौसम विभाग नै अगले किश दिनें दरान गर्मी होर बधने ते मौसम खुशक रौहने दी पेशनगोई कीती ऐ। हासल जानकारी मुजब जम्मू च दिनें दा बद्दोबद्द तापमान 42.5 डिग्री सैल्यिस ते घट्टोघट्ट तापमान 24.5 डिग्री सैल्यिस रिकार्ड कीता गेआ।

<><><><><><>